

REGIONAL NEWS

HEADLINES:-

1. Ministry of I&B Director General, NE Zone, K. Satish Nambudiripad-an vawiin khan Governor Dr. Hari Babu Kambhampati-a leh Chief Minister Pu Lalduhoma te a kawm.
2. Aizawl khawpui laili atanga Zokhawsanga Assam Rifles sawn chhuah dan tura ruahmanna te vawiin khan Chief Minister Pu Lalduhoma hova ngaihtuah a ni.
3. Sorkarin tuialhthei man a tihsan leh buhfai man a tihsan duh lohna lantirin, Congress Thalai ten Vanapa hall kawtah punkhawm an huaihawt.
4. Assama tuilian tuarte chhanchhuah hna ngawrh takin sipaiten an thawk mek.

<><><>

CM

Governor Dr. Hari Babu Kambhampati-a'n vawiin khan a chenna Raj Bhavan-ah PIB leh CBC, Ministry of I&B Director General, NE Zone, K. Satish Nambudiripad a kawm a.

Governor chuan PIB chu centrally sponsored scheme, social security scheme, leh welfare scheme hnuai beneficiary tam ber ten an chhawr tangkai theih nan state puma mipuite hrilhhriat kawngah nasa taka tan la turin a ngen a. State chhunga centrally sponsored scheme, social security scheme leh welfare scheme tam zawk bakah khawtlang mipuiten hamthatna leh sum lama tanpuina tam tak an dawng lo thin chu a ngaimawhawm a tih thu a sawi a. Department thenkhata thawktu thenkhat pawhin an department hnuai central scheme awmte chu an hriat loh bakah kalpui dan dika an kalpui loh thin thu a sawi bawk. Hemi chungchangah hian PIB, DDK leh AIR te nen heng scheme tarlan chungchanga mipui hrilhhriat kawngah hma la turin a fuih a ni.

Vawiin vek khan Chief Minister Pu Lalduhoma chuan a office-ah Pu K. Satish Nambudiripad hian a kawm a. Ministry of I&B in Mizorama hma an lakna tinrengah a tul anga tanpui turin an inpeih reng tih a hrilh.

An Inkawmnaah hian Aizawl Doordarshan Kendra (DDK) Director (News), Nampibou Marinmai leh AIR Asst Director Gin Gangte te an tel a ni.

<><><>

VIGILANCE DEPT

Mizoram sorkarin CBI hnena hnuchhui tura phalna a pek, General Consent chu rampumah dan thar hman a nih hnuah a thara a pek leh a ngai a, hei vang hian Mizoram sorkarin General Consent a lo pek tawh chu a tharin a pe a, hei hi thil thuhmun reng a ni a, sorkar chu a dinna ngaiha a la ding reng a ni.

Vigilance Dept chuan vawiin khan CBI general consent pek chungchang hi thuchhuah a siam a, Mizoram sorkar chuan inthlan laia mipuite hnena a intiamna angin kum 2023 December ni 28 khan CBI te hnenah General Consent a lo pe tawh a, amaherawhchu tun thla ni 1 atang khan Criminal Law thar - Bharatiya Nyaya Sanhita, 2023 chu a lo chhuah tak avangin, chumi zulzui chuan CBI-in a chhui theih tur offence hrang hrang te chu a tharin tihchhuah a ni a. Hetianga dan thar hnuai CBI-in offence a chhui theih tur a thara an rawn chhuah leh tak avang hian State sorkar- in a hmaa CBI hnena General Consent a

lo pek kha pek thar leh a ngai ta a, June ni 27 khan Mizoram sorkar chuan CBI hnenah General Consent a pe thar leha, Official Gazette- ah July thla khan chhuah nghal a ni, a ti.

<><><>

CM – ASSAM RIFLES

Aizawl khawpui laili atanga Zokhawsanga Assam Rifles sawn chungchanga thil pawimawhte sawihoin vawiin khan Chief Minister Pu Lalduhoma hovin Assam Rifles hotute leh Mizoram sawrkar mi pawimawhte an thukhawm a.

Chief Minister chuan sawrkarna an lak hnuah Assam Rifles sawn chhuah chungchang hi engmah an la sawi chhuak lo tih sawiin, Central sawrkar rilru dik tak hriat an duh vangin an ngaichang, a ti a. Thla hmasa ni 20-a Union Home Minister, Amit Shah-a a kawm tumin Central Minister zawk hian sawi chhuakin, Aizawl khawpui laili atanga Zokhawsanga AR sawn chhuah chu thutlukna siam fel tawhsa a ni a, an sawn ngei dawn, a ti a. Hmalak tawh chin te ena August thlaa rawn zin a tum thu a sawi bawk avangin hmalak tawh chin te leh hmabak awm te rang taka umzui a ngai a, hei vang hian Joint Meeting hi an buatsaih ta a ni, a ti.

Mizoram Home Department-in a tir atanga vawiin thlenga hma an lo lak tawh chin te chipchiar takin an sawifiah a, chumi hnuah department dangten an hmalakna pawimawh zual te an sawifiah ve bawk a. Assam Rifles hotute hian loneitute tana an ram paltlangna kawng thar laih vang hian an Magazine Building leh Firing Point hmun te sawn a ngaih phah tur thu an tarlang a, internal road, water supply leh electric transformer chhe chungchang te pawh an sawi lang a.

Thutkhawmnaa telte chuan loneitute feh kawng thar vanga AR-ho hmunhma thenkhat sawn ngai te bawhzuiin Joint Inspection rang taka neih ni se, an ti a. An tan kawng thar peih anih hma chu loneitute hi Security Pass siamsak ni se, an ti bawk. Zokhawsang internal road leh electric transformer te hi kum 5 kal taa AR hnena hlan tawh a nih avangin a chhe siam hi an kut a ni tawh a. Siam tha tura a bawhzui dan kawng sawipui an ni. Tui supply erawh chu Cyclone Remal lo thlen atanga vawiin thlenga tui supply lama Aizawl khawpuiin harsatna a tawh vang a nih thu tarlan a ni.

Joint Meeting-ah hian Home Minister Pu K. Sapdanga, PWD Minister Pu Vanlalhlana, P&E Minister Pu F. Rodinglana leh PHE Minister Prof. Lalnilawma te, Inspector General Assam Rifles (East) te leh sorkar mi pawimawh tak tak dangte an tel a ni.

<><><>

UD&PA MOU

Vawiin khan UD&PA Minister Pu K. Sapdanga hovin UD&PA Department hnuah office hrang hrang - Aizawl Municipal Corporation, Directorate of UD&PA leh Aizawl Smart City Limited te tangho hmalakna tur “Comprehensive Plan for Municipal Waste Management in Aizawl” atan thawhhona thuthlung ziah a ni.

He ruahmannain a tum ber chu sawrkar department mai bakah mipui mimir tanhona hmanga Aizawl hi India ram khaw fai berte zinga siam a ni. He ruahmannain hnuahia Khawpui kawthler leh mipui vantlang hmun mai bakah lui leh kawr te bawlhhlawh awm lo leh fai taka siam.

Bawlhhlawh tawih thei lo a sawngbawl dan tur leh a paihna hmun turah chauh paih dan tur ruahman a ni a. Hemi atan hian Material Recovery Facility chu Luangmual IGC hmunah din turin hma lak mek a ni.

Tunhma atanga Bawlhhlawh lo intiang vum sa te thianghlim tak leh awmze nei deh ral tum a ni s.

Aizawl District leh District dang 4 – Kolasib, Mamit, Serchhip leh Saitual a Hospital leh healthcare facilities hrang hrang a bawlhhlawh te chu a halralna hmunah thianghlim taka tih ral tum a ni a. Hemi atan hian Common-Bio Medical Waste Facility chu Tuirial ah din niin, tun ah hian thla 2 chhung atan trial nei turin ruahmanna kalpui mek a ni.

Leivung paihna mumal taka siam turin hmalak mek a ni bawk a. AMC in hmun hrang hrang an ruahman sa bakah Khatla ah leivung paihna tur hi a thar siam mek a ni bawk.

Insakna bungraw hluihlawn paihna leh sawngbawlina tur pawh Hualngohmun-ah ruahman mek a ni bawk.

<><><>

NHM

National Health Mission, Mizoram hnuai Programme pakhat RBSK leh Ebenezer Medical Centre, Aizawl te tangkawp in Mizoram-a a hmasa ber atan Naupang 11 te Lung Pawp hnawh a ni.

Ebenezer Medical Centre ah Dr. Vanlalmalsawmdawngliana (Dr. Msa), Cardiologist leh a Team te hova Congenital Heart Disease Device Closure Camp neih niin, RBSK in a Mizoram chhunga veng leh khaw hrang hranga naupang lungpawp hnawh ngai an refer naupang 11 te lungpawp hlawhtling taka hnawhsak an ni a. Naupang 11 te hi dam taka chhuah vek tawh niin Naupang 11 te Lung pawp hnawhna man Hospital Bill hi RBSK, National Health Mission, Mizoram in a tum a ni.

He Device Closure Camp hi India rama naupang lung enkawltu thiam hmingthang, Dr. Nageshwar Rao, Rainbow Hospital, Hyderabad chuan arawn vil bawk.

Tun tuma naupang 11 te chhiar tel hian, RBSK, National Health Mission, Mizoram chuan naupang Lung thalo Inenkawl ngai te Hospital Bill mi 101 alo peksak tawh a ni.

Kum hmasa lamah chuan RBSK hian hetiang ang Device Closure ngai case hi state pawna Hospital lianah a refer thin a, kalkawng man te, ei leh in leh thlenna mai bakah tawngthiam hruaina manah naupang chhungten sum tamtak an seng thin a. Tun tumah erawh Mizoram chhung ngeiah Dr. Vanlalmalsawmdawngliana hovin Ebenezer Medical Centre, Chawnpui, Aizawl ah naupang in inenkawlina tluantling an dawngin Naupang chhungte ah phurrit nasa takin a chhawk zangkhai a ni.

Naupang lung lama harsatna nei, inenkawlina mamawh te tan, Aizawl West DEIC, Kulikawn leh Lunglei DEIC, Lunglei District Hospital ah te in hriattir tur a ni a. Anganwadi Centre leh Sorkar School-ah te a naupang hriselna endik tur a kal thin RBSK Mobile Health Team te hnenah alo in chhinchhiah tir theih bawk a ni.

<><><>

MPYCC

Sorkarin tuialhthei man a tihsan leh buhfai man a tihsan duh lohna lantirin, Mizoram Pradesh Youth Congress Committee (MPYCC) chuan vawiin hian Vanapa hall kawtah punkhawm an huaihawt a.

MPCC Tresaurer Dr Lalmalsawma Nghaka chuan hemi chungchanga thuchhuah a siamah MNF leh ZPM sorkarah engmah danglamna a awm lo tih sawiin, Petrol leh diesel man tihsan tur leh ration buhfai man zaa za a pung tur hian Mizoram mipui a thawng takzet a, mirethei leh harsa zawkte khawsak a ti harsa zual dawn hle a ni a ti.

ZPM sorkar chuan Mizoram sum dinhmun leh an inzawrhna ber an VIP kuthnathawktute harsatna pawh ngaihtuah lova CM adviser, Board Chairman, Consultant leh Supervisor an ruat chawp vak vak te, Municipal Corporator leh Councillor-te hlawh an tipung lehte hi kuthnathawktute hmuhsitna leh palzutnaah Congress thalai chuan a ngai tih a tarlang bawk.

ZPM chuan ann sorkar hunah chhiah an tihsan dawn loh thu a sawi tih tarlangin, Electric leh tui bill leh chhiah dangte pawh an tih pun loh tur thu bakah Asian Development bank leh World bank atangin an puk ve dawn loh thu te, tul miah loa pawisa hman a nih loh tur thu a sawite pawh sorkar kal mekah hian a nih lohzia mipuiin an hmu mek tih a tarlang bawk a ni.

<><><>

SAMPOORNATA ABHIYAN

District hnufual te mu tan thlanchhuah thenkhatte thla 3 chung thlur bing turin sorkar laipui chuan Sampoonata Abhiyan chu ramchung hmundang rualin vawiin hian Mizoramah hawn a ni a,

Mamit ah chuan DC Conference Hall-ah District Bawrhsap Pu V.L. Remliana kaihruaiin hun hman a ni a, District Bawrhsap chuan Mamit District chu India ram district hnufual thlanchhuah zingah a tel avangin sawrkar laipui atangin enkawl leh chhawmdawlina tam tak an dawng a, hei hian hmasawnnna tha zawk thlen se, hmasawnnna hna kal mekah thawh ho thiam a tul bawk a ni a ti.

He hunah hian Line department pali District Education Office, District Agricultural Office, District Programme Office leh Chief medical Office atang te'n an hmalakna, hmachhawp bakah harsatna an tawh thenkhat tarlan a ni a, nawiin vek hian Line Department-te hian hmalakna tur hrang hrangah meeting an nei zui nghal a ni.

Reiek Aspirational Block ah pawh NITI-Aayog hnuaia Aspirational Block Programme saturation drive "Sampoonata Abhiyan" hawn a ni a, Block huamchhunga Department hrang hrang te sawm niin, Key Performance Indicator saturate tura thlan chhuah paruk changtu officer te'n an dinhmun an tarlang a ni

<><><>

ASSAM FLOOD

Assama tuilian tuarte chhanchhuah hna ngawrh takin sipaiten an thawk mek. Assamah hian Dhemaji district-a Sivaguri khuaah leh Arunachal Pradesh-a East Siang district-a Mer khuaahte thla hmasa ni 29 atanga ruah sur nasa vangin tuui a lian nasa hle a. Indian Army te chuan tuilenna hmunah hian State Disaster Relief Force te ten chhanchhuah hna an thawk a. Sivaguri, Namsing Ghat, Paglam leh Orian Ghat ah te darkar 72 chhung chhanchhuah hna an thawk a. Mi 48 an chhanchhuak tawh a. An zingah hian naupang 17, hmeichhia 20 leh kum upa 11 an tel a. An khawsak lailawkna tur hmun siam niin chaw, tui leh damdawite pek an ni.

<><><>